

# Te Whakaaetanga Tohatoha Mōhioatanga kua Whakamanaia nā Te Tira Ahu Ika A Whiro (AISA)

E anga ana a Te Tira Ahu Ika A Whiro [he wāhanga nō Te Ope Kātua o Aotearoa] ki te tāpae kirimana ki ētahi atu hinonga kāwanatanga whai pānga ki te tohatoha kōrero ki a rātou mō ngā Ika ā-Whiro me ō rātou whānau. E kīa ana tēnei momo whakaaetanga he Whakaaetanga Tohatoha Mōhioatanga kua Whakamanaia (AISA). E tautuhitia ana tēnei mea te AISA i roto i te Ture Matatapu.

E mea ana te AISA ka whakapikia e ia ngā ratonga ki ngā ika a Whiro me ō rātou Whānau. I takea mai te huhua o ngā ratonga, ngā tautoko me ngā whiwhinga ki ngā ika a Whiro me ō rātou whānau i ngā āhuatanga o nāianeī, o tau kē hoki, kua pā mai i te hīkoinga ara o tētahi hōia i te ao nei. Hei tauira, ki te tomo tētahi ika a Whiro ki tētahi kāinga noho manaaki tangata wā roa, ki te huri rānei tana noho tahi me tōna hoa, ki te mate, ki te tapoko tētahi tamaiti ki te mātauranga, ka rerekē pea ngā whiwhinga mā te ika a Whiro, mā tana whānau rānei. Ki te whiwhi mōhioatanga hou, tika hoki ēnei whakahaere mō ngā ika a Whiro, ka whai wāhi ki te whakapiki i te pai o te tautoko o nāianeī ki tētahi Ika a Whiro, ki te tuku tautoko hou rānei mehemea kua rerekē te āhua o te noho o taua tangata.

E anga ana hoki Te Tira Ahu Ika A Whiro ki te pēhi i te waipuketanga pepa mā aua ika a Whiro, kia ngāwari kē atu te kimi tautoko mai i Te Tira Ahu Ika A Whiro me ērā atu hinonga kāwanatanga tautoko.

I mua i te whakaaetanga a te Kāwanatanga i te AISA a Te Tira Ahu Ika A Whiro, me mātua mōhio ia kei te mārama te nuinga o te hunga ka pāngia e ōna āhua, me te iwi nui tonu ki ngā mea o roto, kua whai wāhi hoki kia rangona ō rātou āwangawanga (mā te tuku tāpaetanga).

Anei kei raro iho nei tētahi tirohanga whānui ki te AISA a Te Tira Ahu Ika A Whiro, ā, ka taea e koe te rapu kōrero mō te AISA, me pēhea hoki te tuku tāpaetanga ki konei [www.veteransaffairs.mil.nz/aisa](http://www.veteransaffairs.mil.nz/aisa).

Ka taea e koe te imēra i tētahi tāpaetanga mai ki [VANZPOL@nzdf.mil.nz](mailto:VANZPOL@nzdf.mil.nz), ā, ko te wā whakawhiti kōrero kei waenga i te **29 Ākuhata 2022** me te **5pm hei te 7 Oketopa 2022**.

## He tirohanga whānui ki te AISA a Te Tira Ahu Ika A Whiro

**Ko wai mā ka āhei te toha mōhioatanga mō ngā ika a Whiro, he aha ngā mea ka taea te tohatoha e rātou?**

E tautuhi pū ana te AISA e marohitia ana ko ēhea ngā hinonga kāwanatanga ka āhei ki te tohatoha mōhioatanga mō tētahi ika a Whiro, mō tana whānau hoki, waihoki, ka tautuhitia he aha ngā mōhioatanga ka taea te whakawhiti. E kore e whakaaetia te whakawhitinga noatanga o ngā mōhioatanga mō tētahi ika a Whiro i waenga i ngā hinonga kāwanatanga me Te Tira Ahu Ika A Whiro - me tino tautuhi ngā mōhioatanga kei te tohaina i roto i te AISA.

Ka taea ngā mōhioatanga whaiaro te toha i raro i tēnei AISA mehemea ko Te Tira Ahu Ika A Whiro te kaituku, te rōpū whiwhi rānei, anake. E kore e taea e ētahi atu hinonga ngā mōhioatanga ika A Whiro te tohatoha.

E marohitia ana, koia ēnei ngā hinonga kāwanatanga e whai ake nei, hei rōpū whakauru ki te AISA a Te Tira Ahu Ika A Whiro.

- Te Tira Ahu Ika A Whiro, arā, he wāhanga nō Te Ope Kātua o Aotearoa.
- Te Kāporeihana Āwhina Hunga Whara (ACC)

- Te Ara Poutama (Corrections)
- Te Tari Taiwhenua | Department of Internal Affairs (DIA)
- Te Whatu Ora -Health New Zealand (Health NZ)
- Te Mana Tauārai (Customs)
- Te Wāhanga Hauora o Te Ope Kātua, NZDF Accredited Employer Programme Unit, NZDF Human Resources Service Centre, ngā wāhanga Personnel, Archives me Medals, me ngā wāhanga Heritage, Commemorations me Protocoli roto i te Ope Kātua o Aotearoa (NZDF)
- Te Aka Whai Ora -The Māori Health Authority (MHA)
- Te Tāhuhu o te Mātauranga | Ministry of Education (MOE)
- Te Manatū Hauora (MOH)
- Te Manatū Whakahiato Ora (MSD)
- Kairēhita Matua – Whānautanga, Matenga, Mārenatanga | The Registrar-General, Births, Deaths and Marriages (Registrar-General)

Ko ngā mōhiotanga e marohitia ana kia tohaina, mō tētahi ika a Whiro ko:

- Tōna ingoa o nāianeī, o mua hoki
- Te rā me te wāhi whānau
- Ngā taipitopito hoapā
- Ngā taipitopito uruwhenua
- Te mōhiotanga pūmau āe, he ika a Whiro taua tangata, tōna rā whakamutunga i te ope hōia, me ngā taipitopito e pā ana ki tāna mahi hōia i tēnei wā.
- Ngā taipitopito mahere whakapiki ora, taurima hoki o nāianeī
- Ngā taipitopito whakawhiunga
- Ngā ratonga e horaina ana e Te Tira Ahu Ika A Whiro i nāianeī.
- Ngā ratonga o nāianeī, o mua hoki, nā Te Kāporeihana Āwhina Hunga Whara i hora
- Tētahi wā i tomo ai, i wehe ai rānei i te whare herehere
- Ētahi mahere putanga whare herehere, tuitui pāpori hoki
- Ētahi taipitopito kōpikotanga i waho i Aotearoa
- Ētahi mōhiotanga mehemea e mahi ana, kāore rānei
- Ētahi painga kua whiwhi te tangata
- Ētahi hoa, hoa o mua rānei o te ika a Whiro
- Mōhiotanga hononga e pā ana ki ngā tamariki, ki ngā uri, ki ngā tāngata e taurimatia ana, whāngai rānei.
- Ngā rēkoata whānau, mārena, hononga ā-ture, matenga, huringa ingoa hoki.

E mea ana hoki te AISA me tohatoha ētahi, engari kua e nui ngā mōhiotanga mō te whānau o tētahi ika a Whiro. Inā ētahi o ēnei mōhiotanga:

- Tōna ingoa o nāianeī, o mua hoki
- Te rā me te wāhi whānau
- Ngā taipitopito hoapā
- Ngā ratonga e horaina ana e Te Tira Ahu Ika A Whiro i nāianeī.
- Ngā taipitopito whakaurunga whare mātauranga
- Mōhiotanga tuakiri, hononga hoki e pā ana ki ngā tamariki, ki ngā uri, ki ngā tāngata e taurimatia ana, whāngai rānei.
- Ngā rēkoata whānau, mārena, hononga ā-ture, matenga, huringa ingoa hoki.

E kore e taea e ngā hinonga kāwanatanga katoa te tohatoha ngā mōhiotanga taurite. Mā te AISA e tautuhi ko ēhea ngā mōhiotanga ka taea te tohatoha e tēhea hinonga kāwanatanga. Heoi anō nei ngā mōhiotanga ka taea te tohatoha, ko ērā kua tautuhitia i runga ake nei. E kore e taea te tohatoha ngā mōhiotanga hauora me ngā kōnae pēnei i ngā X-Ray.

### **He āhuatanga anō e tika ana kia āwangawanga taku whānau?**

Nā runga i te pikinga ake o te tohanga mōhiotanga e marohitia nei, ka whakaheke pea ētahi o ngā ratonga ka tohaina ki ētahi ika a Whiro me ō rātou whānau, mehemea ka kitea kua kore rātou e āhei kia whiwhi i ngā ratonga, i ngā whiwhinga, i ngā tautoko rānei.

Mehemea he pēnei te tukunga iho, nā te Ture Matatapu i whakahau me mātua tuhi atu, me whakarārangi atu te hinonga kāwanatanga ki taua tangata ka pāngia me te heke anō o ana ratonga, i runga anō i ngā mōhiotanga ka whiwhi i raro i tētahi AISA, me te whakawātea i te tekau rā mahi, kia pai ai tā rātou whakahē i ngā mōhiotanga, ki te whakamōhio hoki kua hē te whakatau. Mehemea i te mutunga ka whakaheke ētahi ratonga, me āta mahi mārire Te Tira Ahu Ika A Whiro kia whakawhitia te hōia o tau kē, tana whānau rānei, ki tētahi atu momo tautoko.

Tērā pea ka āwangawanga ētahi ika a Whiro mō te haumarua o ō rātou mōhiotanga. Kei roto i te AISA ētahi whakaritenga mārō mō te āhua o te tohatoha, me ngā hangarau tohatoha, i taua mōhiotanga.

### **Ka kitea e au ētahi painga mai i Te Tira Ahu Ika A Whiro?**

Mā te AISA ka piki ake te pai o te horanga ratonga ki ngā ika a Whiro, me ō rātou whānau. Ka heke iho te waipuke pepa, engari mā te horanga mōhiotanga tika pū, whai mana hoki (he mōhiotanga muku i te here kia horaina he taunakitanga tuakiri, tūnga rānei) mā te AISA e homai ki ngā hinonga kāwanatanga, ka taea e rātou te:

- Tautohu tika i tētahi tangata takitahi kia mōhio he ika a Whiro ia o tau kē, kia pai ai te hora ratonga ki a ia. Mā tēnei ka taea e taua hinonga kāwanatanga te kōkiri mahi, kāore he tāringa ki ētahi atu kōrero
- Whakatika hohoro i ngā panonitanga ki ngā ratonga e horaina ana, tae atu ki te tīmatanga tautoko ā-pūtea, mehemea ka panoni te āhua o te noho o tētahi ika a Whiro.
- Whakaheke i te waipuke pepa mō ngā ika a Whiro ina arotakea e tētahi hinonga kāwanatanga mō te āhei kia whiwhi ratonga.
- Te whakamōhio wawe i ngā ika a Whiro mō ngā ratonga e āhei ana rātou kia whiwhi rātou.

E anga ana te Kirimana AISA a Te Tira Ahu Ika A Whiro ki te hora mōhiotanga whai mana ki ērā atu hinonga kāwanatanga (kei roto i tēnei AISA) mō ngā ika a Whiro, kia tīmataria e rātou ētahi atu mahi, pēnei i te tāpae ratonga hou, te whakapiki, te whakamahine rānei i ngā ratonga o nāianei, waihoki ngā tautoko, mehemea he panonitanga o te āhua o te noho.

### **Ka aha mātou ināianei, āhea hoki?**

E pōwhiri ana Te Tira Ahu Ika A Whiro i ngā tirohanga a te iwi, i ngā whakaaro hoki, mō te AISA e marohitia ana. E karanga ana Te Tira Ahu Ika A Whiro mō ētahi tāpaetanga.

Ka whakahoki kōrero Te Tira Ahu Ika A Whiro ki Te Rūnanga Matua o te Kāwanatanga mō te whakaaetanga kāwanatanga mō ngā taumata kei mua e marohitia ana. Ki te haere whakamua te AISA, me mātua puta tētahi Tūtohutanga Kaunihera Matua kia whai mana ā-ture ai te AISA. Kāore mātou i te mōhio ka pēhea rawa te roa mō tērā, engari te āhua nei hei mua i te mutunga o te tau 2023.

I muri i tērā ka āhei Te Tira Ahu Ika A Whiro ki te mahi tahi me ērā atu whakahaere ki te whakarite kirimana mahi, kia tīmata ai te toha mōhioatanga.

### **Me pehea au e ako anō ai mō te AISA e marohitia ana, me te tuku tāpaetanga?**

Ko te wā whakawhitiwhiti kōrero hei waenga i te **29 Ākuhata 2022 me te 5pm hei 7 Oketopa 2022.**

Tērā ētahi atu kōrero i te pae tukutuku o te Tira Ahu Ika A Whiro mō te AISA e marohitia nei, ā, mā Tira Ahu Ika A Whiro e whakarite hui Zoom hei whakawhitiwhiti whakaaro anō, me te whakautu i ō pātai, te tūmanako rā. Ki te hiahia koe kia tukua he pōwhiri ki a koe mō ēnei hui Zoom, tēnā imēratia mai tō tono ki [va.communications@nzdf.mil.nz](mailto:va.communications@nzdf.mil.nz).

Kāore he hōputu i āta whakaritea mō tētahi tāpaetanga, nā reira he pai noa iho tō tuku imēra mai, me ō whakaaro, āwangawanga hoki ki [VANZPOL@nzdf.mil.nz](mailto:VANZPOL@nzdf.mil.nz).

Mō ētahi atu mōhioatanga mō te AISA Whakaaetanga Tohatoha Mōhioatanga kua Whakamanaia nā Te Tira Ahu Ika A Whiro), tēnā haere ki <https://www.veteransaffairs.mil.nz/aisa>